

Geloxrxi Sul

1

¹⁻² Ngo mel Barloxr a. Ngo Arbosobo xiar dae mel dax bei mae dae a, Yisu Zidu miardal dae ca bei a. Niul ddei arzzi-nimar Tixrmoxrtaexl ngua nnel, nia Geloxrxi zzi gga Arbosobo ddei cassor-worssor mel leil xil vaexr gger. Nia mel dder Zidu dax hher ji dae arzzi-nimar arzzi-nimo mel nga a.

Niul ddei Arbbor Arbosobo nia leil cirza-hanga meixl gger lol nia, nia leil nixmox zzaso lol nia!

Barloxr Arbosobo Leil Nawo

³⁻⁴ Nia Yisu Zidu leil yarzi sael ddarzzi dae, halae Arbosobo ddei cassor-worssor maelmaerjia leil yarzi sael perniar dae ngua bbejjiur a. Yel ngua nia leil Arbosobo dax ddar biar gger car a lei zoxlzoxl a Arbosobo hherdder niul ddei Seirpor Yisu Zidu Yarbbor leil nawo. ⁵ Nia eine bei a mel, merlabbor zza dae mel li wo loxia a nga arddeir a. Nia li wo loxia eil mel mel dder halleix Yisu leil biar dae ddar seirseir mel nia dax biar ci car a nia noni wo hal mel nga a. Yisu leil biar dae ddar seirseir mel hherdder Arbosobo ddei ddarzi mel nga a. ⁶ Ddar seirseir eil mel mel nia dax lar biar ci nr nga a nei, ho bei ho middurbbor cirmaex-hanga lei biar ci a, yel ca mel leil ca mu box lol. Hherdder halleix nia Yisu leil biar dae ddar seirseir mel bbejjiur a, Arbosobo yarzi nia leil seirseir meixl gger dae mel saexl ho a, yel nia leil ca mu box lol sael a nga. Eil ddei mel dder saer zzei mel ho ner ho vaer a, saer niar teixl lei mel sael a nga. ⁷ Nia ddar seirseir eil mel zza wo a mel niul perniar dae Yirbafuxr mi ca hal ddei dax zza wo arddeir a. Yar mel ngua dax cirgo a Zidu leil visser su a. Yar ngua leil weix a zabbar seirseir a

Zidu leil visser. ⁸ Halae Arbosobo ddei Xiu ddei nia leil beijjiu a, nia zzicarzzi leil perniar dae, yar ngua leil biar gger a.

⁹ Yel ngua bbejjiur hal cir ni cirdae a, cirleixr nr nor nia leil Arbosobo dax ddar biar gger. Ngua Arbosobo leil qiuxr a, yar ddei Xiu ddei nia leil olnoolddu lol, Arbosobo xiar dae mel leil saexl lol, yel nia dder Arbosobo nia leil azo bei lol saexl. ¹⁰ Eine nga a mel, nia bei dae mel nei bbeix dae mel lei Seirpor xiar dae mel dax ciryoxr a nga, halae azo bei lei yar leil ggesel lol: nia nixixl goxr a lei cirza-hanga seirseir bei teixl lei, hherdder saer zzei mel saer naxrcixl niar teixl lei sael a nga; halae nia ho bei ho Arbosobo leil saexl dax; ¹¹ Arbosobo azo lei bei bbesur zza, yar nia leil ddo lol nia. Eine nga a mel nia ssertexr zza, azo pex dae lei nia ssersei xie, halae nixmox zzar ggegge-sese a ¹² Arbosobo leil nawo. Arbbor Arbosobo mel yar ddei cassor-worssor mel leil cirza-hanga seirseir meixl gger nia bbeix har zaxr goxr a. Niul Arbosobo ddei goxr gga hher dae a, yaa dax cirgo a eil mel li wo ddo. Yar ddei goxr ddei mel bbobbolbbo zza. ¹³ Yar mel niul leil neixmar ggie, hherdder Sardaxl ddei goxr gga jiuxl teixl lei a; niul leil yar ddei Ssorzil-ssorya ddei goxr gga ddir lol a. ^{a 14} Yar ddei Ssorzil-ssorya ddei mel armael ddei olga sser a niul leil vae xixl lei a, niul ddei zuixl mel leil ssoxrsuxl a.

Zidu Mel Maelmaerjia Leil Vaer Leixl

¹⁵⁻¹⁶ Arbosobo mel yar ddei Ssorzil-ssorya ddei leil sser dae a, merlabbor zza dae, middurbbor zza dae, mia ddo mel, mia nr ddo mel

^{a 1:13} *Yar mel niul leil neixmar ggie, hherdder Sardaxl ddei goxr gga jiuxl teixl lei a; niul leil yar ddei Ssorzil-ssorya ddei goxr gga ddir lol a. Ca mel Yisu leil ddar-nr-zzi car a Sardaxl te yaa leil guaxr. Yaa mel dder neixmar ggie hher dae sael a nga. Yisu leil ddarzzi su mel nael Yisu yaa leil guaxr. Yaa mel dder bbele ggie hher dae a.*

nei merlabbor middurbbor vaervaerpor bei su mel, azo lerler guaxr su, quexrlixl zza su, cirza-hanga eil mel bei a. Eil zzu lorbba lei yar leil weix a bei arddeir a. Yar mel dder mia nr ddo Arbosobo ddei yaxlzi ddei nga a. Yar mel hazza-hamaer leil lei vaer leixl; yar mel zza beil zzir ddei nga a. ¹⁷ Yar mel azo lei nr zza seir dder gol dae ho a. Cirza-hanga lei yar leil koxl dae a zza doxr dae. ¹⁸ Yar mel ggecir ddei oldde a. Ggecir ddei mel dder Yisu leil ddarzzi su cir nga a. Yisu mel zza beil zzir ddei nga a; gol du xixl lei beil zzir ddei nga a. Yar cirza-hanga leil lei vaer leixl. ¹⁹ Arbosobo mel yar leil cirza-hanga lei yar armael dax^b ciryoxr a nga lol ggese, ²⁰ halae yar leil sixrzixljiaxl ddei leil si lol a, sirnilni ddux lol. Yel merlabbor middurbbor cirza-hanga lei yar leil koxl dae a, Arbosobo dax seir xixl a. ²¹ Halleix nia xiar dae nei bei dae mel nr seir a, nia Arbosobo dax bbe kae a, yar leil dir. ²²⁻²³ Nael eilboxl Arbosobo ddei Ssorzil-ssorya ddei mel nia leil weix a si ho a. Yel nia ddarzi mel leil vever a ddarzzi doxr dae, halae bei mae doxr dae arddeirnga a, nia dder yar leil koxl dae a, Arbosobo dax seir xixl a. Arbosobo eine bei a mel, nia yar meixsaer qier leil hher dae car a, nia leil seirceix-seirmaer, nr seir lei ardoxr nr zza, botaddu lei ardoxr nr zza loxr lol a. Yisu leil biar dae ddar seirseir eil mel mel halleix nia bbejjiur goxr a; halae middurbbor ca cirddeir-hanga leil lei biar gger goxr a. Ngo Barloxr lei hherdder ddar seirseir eil mel leil weix a, Yisu leil visser su bei a.

Barloxr Jiaxlhuixl Leil Miar Bei Gger

²⁴ Ngo nia leil weix a goxr sol a lei, ngo yarzi ggese. Ngo ggecir ddei

^b**1:19** *Arbosobo mel yar leil cirza-hanga lei yar armael dax* Xilmeir “yar” ddei mel Yisu leil bbeix; giedae “yar” ddei nael Arbosobo leil bbeix.

goxr solsol eil mel goxr a mel, Yisu Zidu ddei ggecir leil weix a goxr. Yisu Zidu ddei ggecir ddei mel Yisu leil ddarzzi su ca mel leil bbeix arddeir a. Ngo goxr sol dae eil mel Yisu Zidu lei goxr sol goxr a.²⁵ Arbosobo ngo leil Yisu leil ddarzzi su ca mel leil visser su bei lol. Yar nia leil weix a ngo leil miar ar jji gger a. Ngo ddei miar ddei mel dder Arbosobo ddei ddar maelmaerjjia nia leil biar gger jjia.²⁶ Ddar eil mel mel halcar a hormo zeix nei hormo zeix ca saexl nr goxr mel nga a. Nael eilboxl Arbosobo ddei cassor-worssor leil saexl lol a.²⁷ Kerzi dae ddar seirseir eil mel lei Yoxrtaexl su nr nga ca mel leil yarzi sael seir lol var. Yarzi sael seir lol eil ddei mel dder Zidu nia Yoxrtaexl su nr nga ca mel nixmox zzar hher ji dae a bbeix arddeir a. Nia lei Arbosobo sael a middux loxia.

²⁸ Ngua yar arseir a ca maelmaerjjia leil biar gger. Arbosobo ngua leil saexl lol cirza-hanga mel, ca mel leil quex, ca mel leil mul gger. Ngua eine bei a mel nia ca cirddeir-hanga leil Zidu leil koxl dae a Arbosobo meixsaer qier leil seirceix-seirmaer lol niazzir a nga arddeir a.²⁹ Ngo lei dder eil ddei leil weix a yarzi sulku, Zidu ngo leil bbesur gger mel sser dae a, arsae bei cexr arsae bei dae a.

2

¹ Ngo nia leil saexl lol niazzir, ngo nia leil nei Lardirjia zzi gga su ca mel leil halae ngo leil mia nr goxr seir ca maelmaerjjia leil weix a, hormo goxr sol hormo goxrnaxr si lei a.² Ngo eine bei a mel yaa leil nixmox dder vaer a, yaa leil zzicarzzi leil perniar lol, zzicarzzi dax cir piar a bei lol. Eine nga a mel, yaa dder yaa ddarzzi dae mel yarzi a saexl gaxzi var. Arbosobo halleix ca leil nr saexl lol hal mel leil saexl var. Ca leil nr saexl lol hal ddei hherdder Zidu nga a.³ Yar mel yarzi olnolddu, cirza-hanga lei saexl. Eil mel mel yarzi naxrcixl.⁴ Ngo ddar eil mel bbeix a mel kebal ca mel ddar noni zaezaemo hal mel bbeix a, nia leil fur lol nia-nr-zzir a

bbeix arddeir a. ⁵ Ngo ca ddei nia dax halmaex nr hher dae bbeixarnar, nael nixmox taex mel nia dax cirgo a hher dae. Ngo nia azo bei lei barverver a bei dae a, nixmox zzar lei Zidu leil velper a ddarzzi dae mia a, ngo dder yarzi ggese a.

Ca Ddei Leiddur Mel Ca Leil Guaxr Nr Gex Dae

⁶ Nia Yisu Zidu leil nia ddei Seirpor bei lol ho a mel, nia dder yar dax bei mae dae nia. ⁷ Hherdder ho bei ho yar dax naer. Nia leil mul gger goxr a mel sael a, nixmox zzar Yisu Zidu leil velper a ddarzzi dae, yar leil yarzi sael nawo.

⁸⁻¹⁰ Arbosobo mel cirddeir-lorbba Zidu dax hher ji dae; Zidu mel dder yar ddei yaxlzi ddei nga a. Nia Zidu leil koxl dae a mel, nr zza lei ar yoxr nr zza, cirza-hanga lei zza. Yar mel dder merlabbor middurbbor vaervaerpor bei su, quexrlixl zza su maelmaerjjia ddei oldde ddei nga a. Yel nia fadae nia. Nr nga a, ca mel nga-nr-zi hal mel nia leil mul gger a, nia leil fur si leilei. Yaa mul gger dae mel mel, Zidu miardal dae mel dax zox dae a mul gger nr nga a nei, ca mel ddei leiddur nei ca mel biar dae mel dax zox dae a mul gger dae lalnga.

¹¹⁻¹² Nia sexlsir car a mel, nia leil dder Zidu dax cirgo a giexlhex ho sael a nga. Nia yoxl Zidu leil gol du xixl lei lol su Arbosobo ddei leil ddarzzi a, nia dder Zidu dax cirgo a gol du xixl lei ho a. Yel nia gelir bei a mel, ca nia leil ggecir ddei leil bei gger nr nga a nei, Zidu nia nixmox zzar bei gger. Zidu nia nixmox zzar gelir bei a mel hherdder nia zuixl bei goxr mel bei pixl gger a.

¹³ Halleix nia mel zuixl zza, nixmox zzar lei gelir bei nr goxr, nia ddei zuixl mel leil mel ssoxrsuxl nr goxr, yel nia ddei xiu ddei mel si ho a. Nael eilboxl Arbosobo mel nia zuixl maelmaerjjia leil ssoxrsuxl a, nia ddei xiu ddei leil Yisu Zidu dax cirgo a gol du xixl lei lol a. ¹⁴ Arbosobo Ddei Sul ber gga vaexr dae Lixlfaxr mel ca leil goxl, ca leil dir. Nael Arbosobo eil

mel sixrzixljiaxl ddei leil diexr gex gger a, bei pixl gger a, yel zeixleixr lei ca leil goxl nr var. ¹⁵ Arbosobo mel merlabbor vaervaerpor bei su, quexrlixl zza su maelmaerjjia leil quexrlixl nr zza lol. Yar sixrzixljiaxl ddei leil sser dae a, yaa leil bei leixl gger a, arseir leil lei igax lol.

¹⁶ Yel nia zzorzzor-ddadda nei jiaxni-jiaxxixl goxr, halae bbecir-bbexiu bbo ddeixteixl cir ni goxr, bbeixsael wornol nixixl goxr a lei, ca mel leil nia leil eine bei nia, hane bei nia, guaxr dae lol nr ddo. ¹⁷ Ca mel zzir dae a Arbosobo dax seir xixl a mel, leiddur cirke bei nia, jiax cirke goxr nia. Nael Zidu lei ho a, niul yar leil ddarzzi a saelnei Arbosobo dax seir xixl cexr. ¹⁸ Ca cirmelmel a tisir mel leil zi meixr. Yaa nr col mel sael a bei laexl. Yel nia ca hal mel leil nia leil fur lol nr ddo. Nr nga a dder Arbosobo nia leil gger hal mel li wo nr ddo. Yaa mel yaa meixcir mia mel biar doxr. Yaa xiar dae mel mel, Arbosobo xiar dae nr nga, yel yaa yarzi col. ¹⁹ Ca hal mel mel niul ddei oldde Yisu Zidu dax bbe kae ho a. Yisu Zidu mel hherdder niul yar leil ddarzzi su ca maelmaerjjia ddei oldde ddei nga a. Niul nael, yar ddei ggecir sael a nga. Yel niul Yisu Zidu leil koxl dae a saelnei zixl cirzixl-hanga, zzur cirzex-hanga lei zzicarzzi dax niar gex dae a, Arbosobo xiar dae ddei sael a ggecir ddei ho bei ho vaer du lei var.^c

²⁰⁻²¹ Nia Zidu dax cirgo a si a, yel nia middurbbor ddei ca nr nga a nei,

^c**2:19** *Yel niul Yisu Zidu leil koxl dae a saelnei zixl cirzixl-hanga, zzur cirzex-hanga lei zzicarzzi dax niar gex dae a, Arbosobo xiar dae ddei sael a ggecir ddei ho bei ho vaer du lei var.* Yisu Zidu mel dder ggecir ddei oldde. Oldde taex ggecir cirddeir-lorbba leil guaxr mel sael a Yisu Zidu lei yar ddei cassor-worssor maelmaerjjia leil guaxr, yaa leil ho bei ho yar dax mae dae lol. Ggecir lei zixl cirzixl-hanga, zzur cirzex-hanga lei zzicarzzi dax niar gex dae mel sael a, Yisu Zidu yar ddei jiaxlhuixl leil zzi dax niar gex dae lol.

Arbosobo ddei goxr gga ca loxr ho a. Nael nia arsaenga a halae “vei nr ddo, zzor nr ddo, ta nr ddo” ca bbeix dae leiddur eil mel dax bei mae dae leir? ²² Eil mel mel ca mel miardal dae lalnga, ca mel mul gger dae lalnga, eil mel bei a ca dax guaxr-nr-zoxr. ²³ Yaa armael xiar dae mel dax bei mae dae a tisir mel leil zi, ca nr col mel sael a bei laexl, armael ggecir leil bei no gger. Kebal ca mel i dae a yaa bei dae mel yaa dax guaxrzoxr, nael yaa halae armael ddei ggecir ddei leil guaxr ssei nr xie. Yel yaa bei dae mel, baexr a bei lalnga.

3

Arsae Ca Mu Box

¹ Nia mel Zidu dax cirgo a gol du xixl lei ho a. Yar mel merhhexr gga Arbosobo ddei yo piar a gga cux dae, yel nia merhhexr gga cirza-hanga mel leil xiar nia. ²⁻³ Nia mel Zidu dax cirgo a si a, yel nia ddei olga ddei mel Zidu dax cirgo a Arbosobo dax halmaex hher dae a middurbbor ca mel mia nr xie. Yel nia middurbbor ddei hal mel leil xiar nr nga a nei, merhhexr ddei hal mel leil xiar nia.^d ⁴ Zidu mel dder nia ddei olga ddei nga a. Yar bbobbolbbo jjixr lei a ca leil mia lol car a, nia lei yar dax cirgo a bbobbolbbo lei a, ca leil mia lol nia.

⁵ Yel nia mel nia ggecir ddei nr seir bei niazzir dae, hherdder zzi dax kerjjar, capor maerssor nr loxr seir a zzi dax naer, nixmox zzar

^d**3:2-3** *Nia mel Zidu dax cirgo a si a, yel nia ddei olga ddei mel Zidu dax cirgo a Arbosobo dax halmaex hher dae a middurbbor ca mel mia nr xie. Yel nia middurbbor ddei hal mel leil xiar nr nga a nei, merhhexr ddei hal mel leil xiar nia. Ca mel Zidu dax cirgo a si a mel, yaa dder zeixleixr zuixl bei nr meixr a. Yaa armael leil weix a ca mu nr nga, Zidu leil weix a ca mu.*

sei-nr-beix, armael leil guaxr ssei nr xie, nixmox zzar nr seir xiar, yarzi meixneixl, cirza-hanga eil mel bei ssi nr ddo. Meixneixl a mel hherdder bbex leil zi mel dax ciryoxr a nga. ⁶ Zuixl eil mel bei su ca mel dder Arbosobo ddei ddar nr no a, yel Arbosobo sirzzi a yaa leil faxr nia. ⁷ Halleix nixixl goxr a, nia lei zoxlzoxl a eil mel leil bei doxr. ⁸ Nael eilboxl mel si leil sirzzi nr ddo, si leil vuxryixr nr ddo, si leil bbeix vuxryixr nr ddo, halae ddar lei nr nga noni nr zae hal mel biar nr ddo. ⁹⁻¹⁰ Nia zzicarzzi leil fur nr ddo. Nia halleix zuixl zza ca hal ddei mel, pia li sael a lael pixl a. Nia mel ca sixl ar ddei lael box ho a. Ca sixl eil ddei mel ho bei ho Seirpor leil saexl dax a, cirza-hanga coxl su Arbosobo ddei sael a loxr a. ¹¹ Eine nga a mel, Xilaxl su ca bbeixsael Yoxrtaexl su ca eine nr bbe a; gelir bei goxr bbeixsael bei nr goxr, azo lei nr saexl su bbeixsael sul zza nr goxr su, zebol bbeixsael armael lozza su, eine nr bbe a. Yaa Zidu leil ddarzzi ho a mel, Zidu yaa cirddeir-hanga dax hher ji dae a. Zidu mel dder zoxlyoxl zzir ddei nga a.

¹² Arbosobo mel nia leil perniar a, nia leil tiur teixl lei a, yar ddei cassor-worssor seirceix-seirmaer hal mel bei lol. Yel nia ca leil zoxlnixr nia; ca leil perniar nia; col nr ddo; ddar te a lei norlixlix a te nia; nixmox zzar ssertexr zza nia. ¹³ Zzi dax zex ddu zza a lei, zzi leil sserddo nia; zzi leil ssoxrsuxl nia; Seirpor nia leil arsae ssoxrsuxl mel, nia lei ca leil arsae ssoxrsuxl nia. ¹⁴ Eil mel bei dae ho a lei, halae ca leil perniar nia. Nia ca mel zzi leil perniar arddeirnga a, nia dder zzi dax toltor a bei var.

¹⁵ Zidu nia leil tiur teixl lei a, ggecir cir ddei a loxr lol,^e zzi dax toltor a bei lol, yel nia Zidu leil nia nixmox zzar hher ji dae lol a, nia leil zzaso lol nia. Nia yar leil nawo nia. ¹⁶ Nia Zidu ddei ddar mel nia nixmox zzar bbilbbi hher ji dae lol nia. Yel Zidu ddei ddar mel nia leil olnolddu lol mel

^e**3:15** *ggecir cir ddei a loxr lol* Ddar eil qier ddei yilsi mel dder maelmaerjia Yisu dax cir piar a bei.

dax zox dae a, zzi leil mul gger nei zzi leil quex. Nia nixmox zzar Arbosobo leil nawo a, Sipi Sul hal ber leil vaexr dae ddar mel caxlgo caxl, Arbosobo leil bbeix zae gger caxlgo hal mel caxl, halae Arbosobo ddei Xiu ddei ni leil caxl teixl lei lol caxlgo mel caxl. ¹⁷ Nia mel azo bei, azo bbeix lei Seirpor Yisu leil holcir dae nia. Yar leil koxl dae a, Arbbor Arbosobo leil nawo nia.

Cirhexr-Lorbba Yisu Leil Ddarzzi Su Ca Mel Leil Mul Gger

¹⁸ Nia maerssor bei su mel, armael ddei capor ddar no nia. Eil ddei mel dder Seirpor Yisu leil ddarzzi su mel bei mibbe ddei nga a.

¹⁹ Nia capor bei su mel, armael ddei maerssor leil perniar nia, yaa leil ci nr ddo.

²⁰ Nia ssormine mu su mel, azo bei lei arbbor-ama ddei ddar no nia. Nia eine bei a mel, Seirpor dder ggease a.

²¹ Nia arbbor mu su mel, ssormine leil sirzzi lol nr ddo. Nr nga a, yaa azo bei lei bei qier-nr-mi a.

²² Nia zebol bei su mel, azo bei lei nia middurbbor ddei seirpor ddar no nia. Nia bei dae mel mel, nia seirpor ddei leil ggease lol a, yar nia leil mia dae bbeixsael nr mia dae lei, zabbar seilseir a bei nia. Hherdder nia Seirpor Arbosobo leil i du yar leil gexr a, yar leil miar bei gger dae mel sael a bei nia. ²³⁻²⁴ Nia Seirpor Zidu leil visser a mel, yar nia leil gger bbeix har zaxr dae hal mel li wo ddo nia saexl. Yel nia azo bei lei arsae bei var mel dder arsae bei nia. Ca leil bei gger sael a bei nr ddo, Seirpor Zidu leil bei gger sael a bei nia. Nia ca leil visser a mel dder Seirpor Zidu leil visser a. ²⁵ Seirpor Arbosobo mel ca nr i, ca cirddeir-hanga leil lei bbaehhex. Yel nr seir bei su ca hal mel leil mel, Arbosobo dder yaa bei dae mel dax zox dae a, yaa leil bei koxl xixl nia.

¹ Nia middurbbor seirpor bei dae ca mel, nia lei merlabbor hher dae Seirpor ar ddei zza nia saexl. Yel nia, nia ddei zebol leil bbaehhexhhex a bei nia.

² Nia Arbosobo leil nawo a zabbar seirseir a yar dax ddar biar doxr nia.

³ Yoxl ngua leil lei Arbosobo dax ddar biar gger a, yar leil qiuxr a, ngua leil halleix Arbosobo ca mel leil nr saexl lol Yisu leil biar dae ddar seirseir mel ca mel leil biar gger cexr lol. Eilleix ngo leil loxrgier dae a

mel dder ngo ca mel leil eil mel biar gger ssi a nga arddeir a. ⁴ Ngo nia

leil qie, ngo leil Arbosobo dax ddar biar gger, yel ngo leil ddar eil mel

qicurcurmo ca mel leil biar gger ssi lol. Eil mel mel ngo bei mibbe. ⁵ Nia

Yisu leil ddar-nr-zzi su ca mel dax cirgo a hher dae car a, nia olnoolddu nia; arddolcar hoxrsil mel, nia arddolcar leil jiux dae a seirseir bei nia.

⁶ Nia yaa dax ddar biar a lei zoxlzoxl a norbbebbe arla bamur zzazzamo biar nia, hherdder cor ji a yarzi ji hoxrsil mel sael a nga. Eine nga a mel, nia dder yaa leil arsae ddarkoxl nia saexl a.

Zzasoso Dae Biex

⁷ Ngo arsaesael nga dae mel ngo perniar dae arzzi-nimar Tuizigur maelmaerjjia lei nia leil biar gger var. Yar mel ngo dax cirgo a Seirpor leil visser su bei a. Yar lei yarzi koxlsseiddo. ⁸ Ngo yar leil zi a, nia dax

halmaex ssi lol a mel, nia leil ngua arsae lerler nga dae saexl lol a, nia

leil nixmox dder vaer ssi lol arddeir a. ⁹ Halae ngo perniar dae

arzzi-nimar Anixrximur lei Tuizigur dax cirgo a ssi. Yar Yisu leil zabbar

seirseir a ddarzzi dae. Yar mel nia dax halmaex gga su ca a. Yaa nrnel

ngua dax eilmaex arsae nga dae maelmaerjjia lei nia leil biar gger var.

¹⁰ Ngo dax cirgo a loxrgier dae Yallirdaxrgur lei nia leil zzasoso dae biex dae. Banaxrba ddei nimar Marker lei nia leil zzasoso dae biex dae. Marker leil bbeix ci a mel, ngo nia leil miardal goxr a. Yar nia dax

halmaex ssi ci arddeirnga a, nia dder yar leil hexl nia. ¹¹ Yesul mi ca hal

ddei lei nia leil zzasoso dae biex dae. Yar leil mel Yoxrsixldu lei mi. Yoxrtaexl su Seirpor Yisu leil ddarzzi su ca mel gga mel ca eil soler lar Arbosobo ddei goxr ddei leil weix a, ngo dax cirgo a miar bei. Yaa mel ngo leil yarzi beijjiu guaxrzoxr. ¹² Nia dax halmaex su Yirbafuxr lei nia leil zzasoso dae biex dae. Yar lei Yisu Zidu leil visser su ca a. Yar Arbosobo dax ddar biar car a, zoxlzoxl a nia leil zabbar seilseir a Arbosobo dax qiuxr gger dae a, nia leil Yisu leil vever a ddarzzi lol a, yar dax bei mae gaxzi lol; halae nia leil Arbosobo xiar dae mel saexl lol. ¹³ Yar mel nia leil nei Lardirjia zzi gga su halae Xilabolil zzi gga su mel leil weix a, hazzi sulku. Eil ddei mel ngo mia dae. ¹⁴ Niul perniar dae Luxljia nei Dirmar yaa nnel lei nia leil zzasoso dae biex dae. Luxljia mel naxcirjiuxr arddeir a. ¹⁵ Nia leil qie, ngua leil Lardirjia zzi gga su arzzi-nimar arzzi-nimo mel leil zzasoso dae biex gger ssi. Halae Nixrfaxr leil nei yar ake gga Yisu leil ddarzzi su cir leil zzasoso dae biex gger ssi. ¹⁶ Nia xil eil fo zza ho a, Lardirjia zzi gga jiaxlhuixl leil gger a, yaa leil zza lol nia. Ngo yaa leil xil vaexr gger fo nia lei zza nia. ¹⁷ Nia Yalzibuxl mi ca hal ddei leil bbeix gger: “Seirpor ni leil miar bei lol mel, ni zabbar seilseir a bei jjia nia.” ¹⁸ Nia leil zzasoso dae biex ddar eil qier mel ngo armael vaexr a. Nia holcir dae nia, ngo qihher leixrhher leil hexsox neixl gex dae. Arbosobo leil nia leil cirza-hanga seirseir meixl gger lol nia!